

公開組

冠軍

【無端】王忠義

無端鐘鼓又天涯，聚散風前落蒂瓜。  
虛擲一春迷蝶夢，獨憐膏雨釀林花。  
牽蘿山鬼空延佇，吞岸潮聲有怨嗟。  
我畏多情英氣減，辛夷慎莫挂香車。

亞軍

【農家】歐陽志榮

去驛四十步，山農三五家。  
泉枯筧水斷，沙塌碓房斜。  
收稻當寒日，行樵帶落霞。  
喜他生計好，蕎麥又開花。

季軍

【除夕花市】郭維華

燈海人潮笑語譁，繁英織夢映天涯。  
歲殘風月爭今夕，市盛珠璣動萬家。  
新秀成栽喧過客，春泥暫護作奇葩。  
莫言芻狗明朝散，願寄餘香感物華。

## 優異獎

(排名按姓氏筆畫序)

### 【六八初度】尹惠和

驀然回首夕陽斜，逝水年華說不差。  
去日滄桑來白髮，半生氣節比黃花。  
詩書下酒稱常課，綠紫當牕認故家。  
但道無求餘一事，蘄添歲壽未為奢。

### 【遣懷】黃嗣拔

裊裊蘆烟淡淡風，一簾幽夢乍醒中。  
游心物外忘興廢，冷眼人間辯異同。  
興寄琴書娛晚境，情耽詩酒貫初衷。  
清居早謝繁華事，自愛山花寂寞紅。

### 【登覽】潘兆賢

清閑登覽豁雙瞳，飛宇飛橋掩映中。  
一路屐痕風細細，滿湖帆影水融融。  
不思世事驚頭白，放步林間愛葉紅。  
快我此游何歷落，獨撐青眼到晴空。

### 【衡陽偶詠】譚耀華

十萬軍歡凱足誇，彭郎已把小姑拏。  
黃茶嶺下梅千樹，青草橋頭酒百家。  
何意楚狂心止水，多情湘女貌如花。  
衡陽尚記思歸日，回雁峰前數落霞。

### 【秋望】顧植槐

眺遠憑高興未窮，山光如畫識天工。  
亂將斜日騰騰色，染作霜林處處紅。  
流水欲迴千里夢，揚帆擬借一船風。  
浩然詩思襟懷壯，始信秋心有異同。

## 公開組

### 特別獎

(排名按姓氏筆畫序)

#### 【村居】吳其湛

四月新苗未着花，疏籬風透碧窗紗。  
自慚白屋難培李，且向青門學種瓜。  
理穢除荒宜黍稷，汲泉淪茗話桑麻。  
斜陽牧笛人歸晚，幾處炊烟一樹鴉。

#### 【江村消夏】吳國強

白雲深處有人家，臥看閒鷗逐浪花。  
石上濤聲驚睡鴨，江心漁唱和歸鴉。  
浮瓜沉李涼風透，泛棹垂綸夕照斜。  
世俗趨炎非我願，由來恬靜勝繁華。

#### 【暮春感懷】葉蘭英

身世飄零類轉蓬，征帆一去水長東。  
泉流石澗苔痕綠，日落霞飛柳絮紅。  
蝴蝶影迷魂夢裡，杜鵑聲咽雨烟中。  
榆錢滿地傷春暮，燕子歸來故壘空。

#### 【書懷】熊達

歲月頻催鬢髮華，凭欄又見日西斜。  
一身落拓浮滄海，五彩爛斑羨晚霞。  
愧乏經綸酬壯志，聊將紙筆作生涯。  
描龍畫鳳皆無力，亂點胡塗抹醜鴉。

學生組

冠軍

【過澳門氹仔大橋】

李潤滿 香港大學

車射離弦箭，橋彎月半弓。  
三千里急湧，十萬仞長空。  
海鳥迎風下，雲帆逐浪東。  
巍然思振翼，一舉上蒼穹。

亞軍

【春暮遊漢陽古琴臺】

陳巍 拔萃男書院

翦浪橫蘭榭，襟暉拾蘚陔。  
煙凝花氣隱，澤吐練江開。  
蕙質光風轉，琴心金玉裁。  
蘆波牽影去，疑是子期來。

季軍

【遊柳侯祠有感】

何立生 香港大學

閑遊興意緒，爰至柳侯祠。  
魚狎羅池浪，風臨荔子碑。  
屬文堪繼聖，秉義代居夷。  
橈節留前史，徒傷不遇知。

## 學生組

### 優異獎

(排名按姓氏筆畫序)

#### 【遊西湖】

余俊鑫 香港浸會學院

身去橫隄在，湖天一色春。  
清風穿柳影，碧水濯魚鱗。  
歸棹依孤渚，流霞落遠津。  
茫茫游冶處，思我又誰人。

#### 【閒居】

洪若震 香港中文大學

愛此春山景，青叢映杜鵑。  
樓台看落日，竹舍聽流泉。  
把酒乘風去，尋詩抱月眠。  
紛紛塵世事，變滅眼前煙。

#### 【夜觀香港花卉展覽後作】

陳自偉 香港樹仁學院

步趨花國晚，不盡暗香來。  
細草侵泥徑，幽蘭倚玉臺。  
月華為我照，春色向誰開。  
但使芳心許，佳章入夢裁。

優異獎

(排名按姓氏筆畫序)

【春霽】

陳芷珊 香港中文大學

崇朝微雨過，草木盡華滋。  
遠水疑明鏡，幽禽鳴老枝。  
山深雲漠漠，風軟日遲遲。  
壺裡乾坤大，放舟隨所之。

【秋思】

馮心穎 香港中文大學

點點繁星近，秋來雨送涼。  
露螢照書卷，幽夢引壺觴。  
兩岸炊煙盛，一田禾稻香。  
遙遙故鄉事，此夜總難忘。

特別獎

(排名按姓氏筆畫序)

【春郊漫步】

曾智穎 香港樹仁學院

二月郊遊地，聽鶯小徑斜。  
香風鳴翠竹，碎玉綴新芽。  
澗水聲聲樂，丘山處處嘉。  
春光雖信美，吾土在天涯。

【夜酌懷人】

羅裕安 香港中文大學

蒼蒼低萬嶺，寂寂遶空城。  
酒盡知人去，曉來嘆恨縈。  
曾看荷月影，怕聽柳琴聲。  
起送飛鴻過，遙傳摯友情。